

2 Timoti

Nəkwəkwə yame ror kīraru kīn, yame Pol rīmīrai kīmi Timoti

Nəgkīariēn kupən ye nəkwəkwə e 2 Timoti

?Pa rīmīrai nəkwəkwə e? Aposol Pol rīmīrai nəkwəkwə e.

?Rīmīrai ramvən kīmi pa? Rīmīrai ramvən kīmi Timoti. Kīni in morkeikei mə nəməhuak mīnə apa Efesas tūksəvhēkīn mīn.

?Narəyēn rīmnhawor pən iran mīne ye nīpig rīmīrai? Japta infamien kape Ol Wok ramni mə nīpig gavman kape Rom rīmīraptərəkīn Pol apa Rom, kīpəh nīvəhsi-pənien in ye kalabus; kīvəhsi-pən əmə in ye kafan nīmə, kīni mobael mīnə kīmisarha tukun apaikīn, masarə iriə mīn, mə in tukrīpəh napien. Kīni ai, gavman rīmnhēr-yerhav kīn, in rəriwək əmə kape newk kīraru. Mərig nīpig rīmīrai nəkwəkwə e 2 Timoti, gavman kape Rom rīmīvəhsi-pən mīn in ye kalabus. Kalabus a ikīn rahas pīk ikīn. Mərig Ol Wok rəpəh nəvsaoyen kīn narīmnar mīnə a. Nīpig nəkwəkwə a rīmnr ta infamien, narīmnar a rīpīor. Kalabus a in rəutən ikīn, kīni rīskai tuk narmamə tuk nīvənien mīvaag pən kīn. Luk əmə iriu mīn. Mərig Pol rorkeikei mə Timoti tukruə məm in meinai in kafan fren atuatur. Kīni morkeikei mə Timoti tukrīpīk nəkwəkwə mīnə kafan muə.

?Rīmīrai nəkwəkwə e tuk naha? Pol rīrkun mə pəh nien mə tuktu gavman tukrhopni in. Ror

məkneikin in rimirai nəkwəkwə e tuk nərəhu-pənien niməhuak ye kwermi nəmehuə pisin minə tiksın rəmhen kin Timoti. Nipig əutən minə kamhauə tuk niməhuak, kini Pol rorkeikei mə Timoti tukramraptərəkın Nəvsaoyen Huvə, kini mərer tımtim ye nhatətəyen kafan, kini mipəh niginien kin nini-ərhavyen Nəvsaoyen Huvə, mərer matuk tuk nərigien nəmhəyen ye nipran tukmə nahasien ruə.

Pol rimə nəkwəkwə e, ramvən kimi Timoti

¹ Timoti. Yo Pol. Kughen rimirpen-ta yo mə yo aposol kırık kape Yesu Kristo. Kini mher-pə kin yo mə jakni-ərhav promes kafan kape nımraghien rerin ye Yesu Kristo.

² Yakamrai nəkwəkwə e kimik, Timoti. Timoti, ik narık yame yakorkeikei pik. Pəh Kughen, Rımtawə, mine Yesu Kristo Yermaru kapətawə, iriu tukravəhsi-pre nihuvəyen, mine norkeikeiyen mine nəmərınuyen kimik.

Pol ravəhsi-haktə nətərigien kape Timoti

³ Nipig m-fam, yenpig mine yeraan, yakaməhuak tuk ik, kini mamni vi vi Kughen tuk ik. Kini yo, yakor wok kafan rəmhen kin yame ripik minə kimisor, kini yakırkun mə norien has kırık rırkək irak.

⁴ Rıkik raməsik nehe nımrim, kini yakorkeikei pik mə jakəm min ik, pəh rıkik tukragien.

⁵ Rıkik raməsik nhatətəyen əfrakis kafam, rəmhen kin yame kafam kaha e Loes mine nisınim

e Yunis kimirivəh. Kini yakirkun mə taktəkun ai, ik mın nakavəh nhatətəyen a.

⁶ Kughen rimivəhsi-pre nirkunien kimik tuk norien wok kafan nipig yimnərəhu-pre kwermik iram. Kini, yakamuh rikim mə takher nap yerkim tuk norien wok a.

⁷ Meinai Kughen rimipəh norien rikitawə rigin, mərig rimmor rikitawə mə tukramətgah, mamorkeikei, mamor norien yamə mine in rirkun mə kisatuatuk.

⁸ Kini mərig ik, takpəh naurisien tuk nini-ərhavyen Yesu Yermaru, kini mipəh naurisien kin yo yame kivəhsi-pən yo ye kalabus tuk nhagin. Yakamərig nəmhəyen tuk Nəgkiarien Huvə kape Kughen. Kini Kughen tukrivəhsi-pre nəsaninien kimik, takaməkeikei mor rəmhen kin yame yo yakamor.

⁹ Kughen rimivəh miragh ətawə mokrən kin ətawə tuk nimraghien yame ratuatuk, kini nar a, pəh nien mə nar kirik yame kitawə kasor. Mərig In ramor ye kafan atuk nətərigien, mine nihuvəyen kafan.

Nipig rimipəh nor-hanəyen tokrei tanə, mərig In rimirpen-ta Yesu Kristo mə tukrivəhsi-pə nihuvəyen a.

¹⁰ Mərig taktəkun ai, In rimmor əpu nihuvəyen a kimi ətawə ye nuəyen kape Yesu Kristo, yame rimivəh miragh ətawə. In rimmor təkun nimhəyen ye nəsaninien kafan, mivəhsi-pə Nəgkiarien Huvə kape

Kughen, yame ramhajoun ətawə kin nımraghien rerin.

11 Kini Kughen rimirpen yo mə yo yəgkiar kirik, mine aposol, mine yhajoun, mə jakni-ərhav Nəgkiarien Huvə a.

12 Ror pən, yakamərig pik nəmhəyen ye nıprak tukun. Mərig yakpəh naurisien, meinai yakwırkun-ta mə Pa e yakamhatətə iran. Mirkun huvə mə In rirkun narha-huvəyen tuk naha nhagin yame In rımnərəhu-pə ye kwermik mamvən meriaji Nıpig Kwasig.*

13 Timoti, takətərig kin nhajounien atuatur kafak, mikwasig kin swatuk kirikianə əmə, mamraptərəkin nhatətəyen mine norkeikeiyen yame ramsi-pən tuk Yesu Kristo.

14 Nanmın kape Kughen yame ramarə yerkitawə tukramasitu iram, mə takarha-huvə tuk nar huvə yame Kughen rımnərəhu-pre ye kwermim.

Pol ramni vi vi Onesiforas

15 Timoti, ik nakirkun mə yo minə tiksın apa kwənmhan a Tarki, iriə kwərə mir e Fugelas mine Hemogenes, iriə m-fam kwəsapitan kin yo.

16 Mərig pəh Yesu Yermaru tukrivəh-sipən norkeikeiyen kimi Onesiforas mine kafan minə. Meinai nıpig rıpsaah, rınamasitu irak mivəhsi-haktə nətərigien kafak. Kini mıpəh naurisien mə kimivəhsi-pən yo ye kalabus.

1:10: Hib 2:14 **1:11:** 1 Tim 2:7 * **1:12:** Swatuk pisin kirik tuk nukrekin-ien v. 12: “Mirkun huvə mə In rirkun narha-huvəyen naha nhagin yame yo yakamərəhu-pən ye kwermim mivən meriaji Nıpig Kwasig.” **1:14:** 1 Tim 6:20

¹⁷ Nəfra, nɪpɪg in rɪmauə Rom, mamarhakɪn yo, marhakɪn muə meriaji-pə məm yo.

¹⁸ Kini nakirkun mɪn mə in rɪmnasitu pɪk ye narɪmnar rɪpsaah apa Efesas. ! Pəh Yesu Yer-maru tukrɪvəh-sipən norkeikeiyen kɪmin ye Nɪpɪg Kwasig!

2

Norien kape mobael huvə kape Yesu Kristo

¹ Timoti, narik, pəh Kughen tukror rikim rəsanɪn ye nihuvəyen yame ramsi-pən ye Yesu Kristo.

² Naknərig-ta nhajounien kafak yamə yakavəhsi-ərhav ye nɪmri narmamə khapsaah. Vəh nhajounien en, mərəhu-pən ye kwermi narmamə tɪksɪn yamə mɪne narmamə kashatətə irəriə, mə iriə tukharkun nɪshajounien narmamə mɪnə mɪn tɪksɪn kɪn.

³ Nɪpɪg nahasien ramuə tuk ətawə, takaməkeikei mərəer tɪm tɪm rəmhen kɪn mobael huvə kɪrik kape Yesu Kristo.

⁴ Rəmhen kɪn mobael kɪrik to rapəh norien narɪmnar yame narmamə apnapɪg kasor, mərəg in ramor əmə nəkwai kapten kafan.

⁵ Rəmhen kɪn yermamə yame ramaiyu mə tukrapita mɪvəh nərok iran, tukraməkeikei məri-pən fam loa mɪnə kape naiyuyen, tamə rɪpəh nɪvəhyen nərok iran.

⁶ Ratuatuk əmə məkneikɪn, mə yermamə yame ramor pɪk wok ye nəsimien, in tukrəkupən mɪvəh kwənkwan.

7 Rhuvə mə rikim tukraməsik nəgkiarjen kafak, meinai Yesu Yermaru tukrasitu iram tuk nirkunien nıprai nəgkiarjen minə e.

8 Rikim tukraməsik kwənərəus kirik kape King Deved, Yesu Kristo, In a Kughen rimivəh miragh In ye nimhəyen kafan. Kini in e Nəgkiarjen Huvə yame yakamni-ərhav.

9 Mərig kamor yo yakamərig nəmhəyen tuk Nəgkiarjen Huvə a, kamarkis-ətərikın yo kin jen rəmhen kın yemə has kirik. Mərig keinein narkis-ətərikın-ien Nəgkiarjen kape Kughen.

10 Ror məkneikın mə yakamərer tim tim ye nəmhəyen minə fam tuk narmamə yamə minə Kughen rimirpen əriə, mə Yesu Kristo tukrivəh miragh əriə, tuksarə iriə Kughen ye nikhakien kafan kape rerin.

11 Nəgkiarjen e raməfrakis mə,
Tukmə kitawə khauə kirikianə ye Yesu Kristo ye
nimhəyen kafan,
kini In tukrivəh miragh min ətawə.

12 Tukmə kasərer timtim,
kini kitawə tuksarmaru kitawə min.
Tukmə kitawə khaukrekin-pən nimetaitawə
kimin,
Kini In tukrukrekın-pən nimeitaan kimi
ətawə.

13 Tukmə kitawə kasəkapir pawk nəgkiarjen kafan,
mərig In tukraməkeikei mor, meinai In to
rapəh nakapirien kafan nəgkiarjen.

Norien atuatur kape nhajounien Nægkiarieren kape Kughen

¹⁴ Takuh riki narmamə kin nægkiarieren minə e. Kini mamor kwirig kimi əriə ye nimir Kughen mə iriə tukhapəh nisotgohyen tuk nægkiarieren apnapig. Kisotgoh, ripəh nasituyen ye yermamə kirik; mərig ramoriah əmə narmamə yamə mine kasətarig kin.

¹⁵ Arkut skai mə norien kafam tukrhuvə, rəmhen kin yermamə yame ravhirəkin nar, yamə to rapəh naurisien tuk kafan norien. Tukmə nipig Kughen rəm kafam wok, In rirkun neighanien kin, meinai nakamhajoun atuatur nægkiarieren kape nəfrakisien.

¹⁶ Apəh kini marer isok tuk nægkiarieren yamə mine niprairiə rirkək, mine yamə mine khapəh nhasiayen Kughen, meinai narmamə yamə mine kasəgkiar məkna, kamhavən isok pik tuk Kughen.

¹⁷ Kini nhajounien kapəriə rəmhen kin nimap pien kirik yame raməmhir, mamehuə pik. Kwərə mir kiraru irəriə: Haemeneus mine Faelitas.

¹⁸ Iriu kimiravən isok tuk nəfrakisien, marəni mirəmə, “Kughen rimmor ta narmamə kamhamragh min ye nimhəyen, kini to ripəh nor-min-ien irətawə tuk nipig kirik.” Kwərə mir ai kworiah nhatətəyen kape narmamə tiksın.

¹⁹ Mərig nar apnapig əmə, səpaag ye nimə yame Kughen rimmərip ramərer tim tim. Kini rimirai-pən nægkiarieren kirik iran mimə, “Kughen Yermaru rirkun narmamə kafan minə,” *(Nam 16:5)* mine, “Narmamə yamə mine kamhani mhamə iriə

2:14: 1 Tim 6:4; Taet 3:9

2:15: 1 Tim 4:6

2:16: 1 Tim 4:7

2:17: 1 Tim 1:20

narmamə kape Yermaru, tukasəkeikei misapəh norien has minə.”

²⁰ Ətərig-ru. Ye nimə kape yermamə yame kafan nautə ripsaah, plet mine besin pisin pisin minə khapsaah. Kamor tiksın kin gol, tiksın kin silva, tiksın kin nai, tiksın kin kapier. Kampik tiksın, kamətu-pən nar huvə əmə iran. Kampik tiksın, kamətu-pən nırəsıg iran.

²¹ Rəmhen kin narmamə. Tukmə kihvi-ta nırəsıg yerkiria, khauə misəmhen kin plet uə besin yame kamətu-pən nar huvə iran. Kısatuatuk, mharkun nisorien wok ehuə kape Kughen. Masarer matuk tuk norien nar huvə minə.

²² Aiyu mivən isok tuk norien has yamə mine kamhaurə yerki nitamaruə. Kini maməri-pən huvə swatuk kape norien yame ratuatuk, mine nhatətəyen, mine norkeikeiyen, mine nəmərinyen. Əri-pən swatuk a kimiə narmamə yamə mine nakasaiyoh Yesu Yermaru kin nasituyen, yerkiyə yame rhuvə.

²³ Ap mivən isok tuk nəgkiarien ətəwao yamə mine nıprairia rirkək. Nəgkiarien minə e kamhavi-pə əmə timət tuk notgohyen.

²⁴ Mərig yorwok kirik kape Yesu Yermaru tukripəh notgohyen, mərig tukraməkeikei mor huvə pən kimi narmamə m-fam, kini tukraməkeikei muə rəmhen kin yermamə kape nhajounien, kafan nətərigien tukrapomh.

²⁵ Kini tukmə narmamə tiksın kamhani hah kafan nhajounien, in tukraməkeikei meiwaiyu, maməvhag kimi əriə. Tukmə ror Kughen

2:19: Nam 16:5; Aes 52:11; Jon 10:14; 1 Kor 8:3 **2:22:** 1 Tim 6:11

2:23: 1 Tim 4:7

tukreighaan kın ərıə mə ırıə tuksarar ye nərigien kapəriə tuk təvhagə hah, mə ırıə tukharkun nəfrakısien.

²⁶ Pəh ırıə tukhauə mın ye nətərigien huvə, kını mısəta ye kwənməkuru kape Setan, yame ram-raptərəkın ərıə, kasor nəkwən.

3

Kwasig ikin Yesu tukruə məkir narmamə, nahasien tukruə

¹ Kını takaməkeikei mırkun mın narımınar e: Nıpig Kwasig tukruə ipakə, nıpig əutən mınə tukhauə.

² Meinai, narmamə tukasərig əmə ərıə, mısorkeikei pık mane. Mısəusit, mhavəhsihaktə atuk ərıə. Mamhani hah narmamə, mısəsik nəkwai nısınrıə mınə mınə rımrıə mınə, mhapəh nhani-vivi-yen narmamə tuk nasituyen, mhapəh nhasiayen Kughen.

³ Norkeikeiyen kapəriə tukrırkək. Tukhapəh nısəru-kınıen təvhagə hah yamə kamor ırəriə. Tuk-soriah nhag narmamə. Mhapəh nısərha-huvəyen tuk nımraghien kapəriə. Rikirıə tukragien tuk noriahyen yermamə. Tuksəməkın nar huvə mınə.

⁴ ırıə kəut kəsua mınə. Tuksor narımınar ye nətəwaoyen. Mhavəhsihaktə atuk ərıə. Mısorkeikei narımınar tuk nərig-huvə-yen ye nıprairıə, mərig tukhapəh nısorkeikeiyen Kughen.

⁵ Tukhasigəvın əmə nəhuakien, mhapəh nıseighanien mə Kughen tukrívən yerkirıə.

Yuvən isok tuk narmamə kasor məkna

⁶ meinai kamhavən yerkwanu minə, masor nar iko tuk nhavi-ta-yen nərigien kape nīpiraovın yamə mine kapəriə nərigien rapəh nīskaiyen. Təvhagə hah kape nīpiraovın minə a rəmhen kın kajipə pam. Rikiriə rīvən tuk norien hah, kını ravi-əhu əriə.

⁷ Iriə kasətərig kın nhajounien pīsın pīsın, mərig tukhapəh nhaniyen nəfrakisien ye Nəgkiarien Əfrakis kape Kughen tuk nīpig kirik.

⁸ Apa kupən, kwərə mir a Janes mine Jambres* kımawəsik nəgkiarien kape Moses, kını ye norien kirikianə əmə min, narmamə minə tiksın kisəsik nəgkiarien əfrakis kape Kughen. Narmamə minə a, nərigien kapəriə rīnahas. Nhatətəyen kapəriə rapəh nəmhenien.

⁹ Mərig nhajounien eikuə kapəriə to rapəh nərerien ror tu, meinai tukpiəm əpu nətəwaoyen kapəriə, rəmhen kın kwərə mir a Janes mine Jambres.

Mə Timoti tukrəri-pən norien kape Pol

¹⁰ Mərig ik, Timoti, nakaməri-pən kafak nhajounien, mine norien kape nīmraghien kafak, mine naha nhagin yame yakmə jakor, mine kafak nhatətəyen, mine nətərigien apomh kafak, mine kafak norkeikeiyen, mine nərer-tim-timien kafak.

¹¹ Ik nakwīrkun-ta nīpig ətən yamə mine kımnhauə ye nīmraghien kafak, mine norien has yamə mine kımnor irak. Nakirkun norien ətən yamə mine kımnor irak apa Antiok mine Ikoniam mine Listra. Mərig Yesu Yermaru rīmīrəhsi-ta yo ye narimnar m-fam a.

* **3:8:** Eks 7:11, 22, 9:11. **3:11:** Wok 13:50; 14:5; 14:19 **3:11:** Sam 34:19

¹² Mərig, nəfrakisien: Tukah narmamə m-fam yamə mine khamə tuksor kirikianə iriə Yesu Kristo, masor nəkwai Kughen.

¹³ Kini mərig nəmə has minə, mine narmamə kape neikuəyen, iriə tuksor norien has, mhavən, masor yame rahas əgkəp. Tukameikuə irəriə, kamhavən maseikuə ye narmamə.

¹⁴ Mərig ik, Timoti, ik nakwirikun huvə ta əmawə yamə mine yakshajoun ik. Ror pən takaməkeikei məri-pən əmə narimnar yamə mine yakshajoun ik kin, yamə mine nakamni nəfrakisien irəriə.

¹⁵ Ye nəkəskəhyen kafam muə meriaji-pə taktəkun, nakwirikun-ta Nəkwəkwə kape Kughen e yame rirkun nivəhsi-preyen nirkunien kimik mə takhatətə ye Yesu Kristo mə Kughen tukrivəh miragh ik.

¹⁶ Nəgkiarien m-fam ye Nəkwəkwə kape Kughen kamhasi-pən ye nəkwai Kughen əmə, kini misasitu irətawə. Mishajoun ətawə, mamhani-ərhav norien has minə kapətawə, masərəhu atuatur ətawə, kini mishajoun ətawə kin norien yamə mine kisatuatur.

¹⁷ Kisasitu irətawə məkneikin: Kitawə narmamə kape Kughen minə, tukhavəh nasituyen minə fam a, kini mhauə narmamə yamə mine kharkun nisorien wok huvə minə m-fam.

4

¹ Timoti, jakvəhsi-pre nəgkiarien keikei kirik kimik ye nimri Kughen mine Yesu Kristo yame tukruə məkir narmamə m-fam, iriə yamə mine kamhamragh, mine yamə mine kwənhəmə-ta.

Yesu e natukruə mamarmaru; ror pən, yakavəhsi-pre nəgkiarien keikei e mīmə:

² Ni-ərhav nəgkiarien kape Kughen, kini arer matuk tuk nini-ərhavyen, nar apnapig mə rīmar əmə uə rəutən. Ərəhu atuatur norien kape narmamə, kini ni-ərhav norien has minə, kini mivəshihaktə nətərigien kape narmamə. Takamor wok minə e, kafam nətərigien tukrapomh, kini kafam nhajounien tukratuatur mihuvə.

³ Takaməkeikei mor məkneikin meinai, nipig yame ramuə, narmamə tuksəpəh nəgkiarien atuatur, misəri-pən əmə nərigien kapəriə, mamhavəh namhajoun pisin pisin yamə mine kamhani-ərhav əmə nəgkiarien yame narmamə rikiriə ragien tukun.

⁴ Tukhaukreikin-pən nimətirgiriə tuk nəgkiarien əfrakis, mhavən misətərig kin kwanage eikuə minə.

⁵ Mərig ik, arha huvə tuk kafam nərigien nipig m-fam, nar apnapig mə narimnar pisin pisin minə kamhauə ye nimraghien kafam. Nipig nahasien tukramuə tuk ik, takamərer tim tim. Kini yuvən, markurao, mamni-ərhav Nəgkiarien Huvə. Kini takaməkeikei mamor fam wok yame Kughen ravəhsi-pre kimik mə takor.

⁶ Mərig yo, pəh nien mə tuktu, yakmhə. Nimraghien kafak ruauə rəmhen kin nar miragh kirik yame kivaan əru tuk nini-vi-vi-yen Kughen.

⁷ Yo, yimnamaiyu əmə tuk nhatətəyen ye Kughen, mamaiyu huvə meriaji naiyuyen infamien; yakwərapərəkin nhatətəyen kafak.

⁸ Yermamə yame ramaiyu mapita, kəvhəvhəo-pən kimin rəmhen kin nərok kafan. Kini Yesu Yermaru, In raməkir huvə narmamə, məkir nımraghien kafak, mə ratuatuk. Mor apnəpeinə tuk nərok kafak. Kini pəh nien mə yo pisin əmə, mərig tukrivəhsi-pən kimi narmamə m-fam yamə mine kisorkeikei mamhawhin mə In tukruə min.

Pol raməvsao kin kafan minə tiksın

⁹ Timoti, arkut skai mhai miren muə məm yo,

¹⁰ meinai kwən a Demas rorkeikei pik nımraghien kape tokrei tanə e, marar, mapta kin yo, mivən apa Tesalonaeka. Kini kwən a Kresens ruavən ta apa Galesia*, kini Taetas ruavən ta apa Dalmesia. ¹¹ Kini taktəkun ai, Luk pisin əmə ramarə kimru min. Rhuvə mə takrauə kimiru Mak, meinai in tukrasitu irak tuk wok kafak.

¹² Mərig yimnher-pən ta kin kwən a Tikikas apa Efesas.

¹³ Tukmə nipig nakamuə, takaməkeikei mirəh neipən a yame yimnərəhu raməmır apa imei Kapas, apa Traos. Rhuvə mə takpik min kafak nəkwəkwə minə muə. Mipəh nərū-kinien nəkwəkwə yamə mine kimnor kin tiki nəni, mipik, muə.

¹⁴ Mərig kwən a Aleksanda, in yermamə kape norien wok ye aean, in rimnor rahas-pə kimi yo. Yesu Yermaru tukrivəh-sipən tai norien kafan.

¹⁵ Mərig ik min takamərig ik tuk kwən a, meinai in rimnaməsik pik nəgkiarien kapətawə.

* **4:10:** Tukmə ror Kresens rimavən apa Spen. **4:11:** Wok 15:37-39; 2 Kor 8:23; Kol 4:14 **4:13:** Wok 20:6 **4:14:** Aes 59:18; Rom 2:6

16 Kini nīpig kīmisəkupən mīsərip yo ye kot, yīmīni-ərhav nəriġien kafak, kini yermamə rirkək tuk neighanien kin kafak nəġkiarīen. Məriġ kafak narmamə mīnə kīmisap, mīsəpəh yo. (Pəh Kughen tukrīpəh norien tai norien kapəriə).

17 Məriġ nīpig a, Yesu Yermaru, In raməmīr kīmrū mīn, mīvəhsi-pə nīrkunien kīmi yo mə jakni-ərhav huvə Nəġkiarīen Kafan, mə nəmə tanə pīsīn pīsīn mīnə tuksəriġ. Yemehuə kape kot ipakə əmə rīmə tukrīvəhsi-pə narpīnien kīmi yo mə jakaməkeikei mīmḥə, məriġ Yesu Yermaru rīmīvəḥ mīragh yo.†

18 Kini In tukrīrəhsi-ta yo tuk nahasien fam yamə mīne kīmə tukor irak. Mamraptərəkin huvə yo, mīvəḥ yo mīvən ye rao ye neai. Pəh khavəḥ-sihaktə In ye newk mīne newk kape rerīn. Amen.

Nəġkiarīen infamien

19 Yakamni rhuvə tuk Akwila mīne piraovīn kafan Prīsila, mīne Onesiforas mīne kafan mīnə.

20 Kwən a rīnnaməmīr apa Korin. Nīpig yīmītərhav apa Maelitas, mīpəḥ Trofimas raməmīr, meinai in ramḥə.

21 Timoti, arkut skai mḥai mīren muə eikīn e kwasīġ ikīn nīpig kape nokieiyen.

Yubulas mīne Pudens mīne Linus mīne Klodia, mīne nəməhuak mīnə fam kamhāni rhuvə pre tuk ik.

22 Pəh Yesu Yermaru tukramarə kīmiru mīn. Pəh nīhuvəyēn kape Kughen tukramarə tuk əmīə.

† 4:17: Pol rīmə, “Yesu rīmīrəhsi-ta yo ye nəkwai laeon.” 4:19: Wok 18:2; 2 Tim 1:16-17 4:20: Wok 19:22; 20:4; Rom 16:23

**Nəkʷəkʷə imərhakə kape kughen: nirpenien
vi
The New Testament in the Southwest Tanna Language
of Vanuatu
Le Nouveau Testament dans la langue sud-ouest Tanna
de Vanuatu**

copyright © 2011 Wycliffe Bible Translators, Inc.

Language: Southwest Tanna

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tanna, Southwest

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

ad9e16d0-33ca-5cbe-ad05-46d1635fa22b